


MINISTER DI TURISMO TICO CROES A SPLICA D2U-365 E IMPORTANCIA DI NAN VIAHE PA NEW ORLEANS...

E cobertura di mas grandi cu
Aruba lo bay haya durante 1997...



** Durante ensayo di D2U-365 pa nan compromisonan na New Orleans durante e magno evento di Super Bowl, nan a ser honra cu e bishita grato di su excelencia Minister di Turismo Sr. Tico Croes den presencia di Otmar Oduber coordinador di ministerio publico y Calay De Coteau kende ta e coordinador pa e viahe pa New Orleans.

Durante e encuentro ameno aki, su excelencia Croes tabatin e oportunidad pa mira, tende y alaves goza di e repertorio musical cu nos embahadornan cultural lo bay presenta y alaves promove nos unico ritmo asambeho durante e siman grandi di e famoso Super Bowl na New Orleans.

Durante un pauze, Sr. Minister Tico Croes a rueni cu e integrantenan, na unda el a mustra nan cu e viahe aki ta uno sumamente importante pa futuro di nos isla turistico.

E cobertura gigantesco cu D2U-365 lo bay haya durante nan presentacionnan tanto pa e 5 mil periodistanan di Estados Unidos, 700 periodistanan internacional, extravanganza parade y e colosal parada di apertura pa e Super Bowl, cualnan lo ser cubri pa e prestigioso canal FOX TV, sin duda lo expone Aruba su nomber engrande na Estados Unidos y varios paisnan rond mundo.

E motibo cu Gobierno di Aruba a opta pa D2U-365 realiza e viahe tan importante aki, ta debi na e ritmo asambeho cu ta ser concidera como identidad di nos

cultura musical y tambe e hecho di e tremendo acohida cu D2U-365 a sa di cosecha aña pasa durante e Labor Day Parade na Brooklyn, New York, nan a bin na remarka pa bay representa Aruba durante e magno eventonan di mas importante na Estados Unidos, asina Minister Tico Croes a enfatisa.

Su excelencia Minister Croes, a mustra di ta hopi optimista di e viahe historico aki y cu e tin e pleno confiansa cu D2U-365 lo bay realiza un tremendo papel durante nan presentacionnan y cu esaki lo sirbi tambe como e tipo di promocion cu semper Aruba tabata desea, pa di e forma unico aki expande nos mercado turistico aun mas grandi na Estados Unidos y demas paisnan rond di mundo.

Tambe su excelencia Croes a otorga e manager di D2U-365 Raimbirth Croes un carta cu ta garantisar tanto un parti di e viahe y demas gastonan di alohamento durante nan estadia na New Orleans.

E bishita aki a ser altamente aprecia y tambe a sirbi como un estimulo y motivacion inmensamente pa e integrantenan di D2U-365, kendenan di nan parti a expresa nan gradicimento y alaves a participa na Minister Tico Croes cu nan tin e viahe aki hopi na serio y cu su excelencia Croes y henter pueblo di Aruba por conta cu un digno representacion manera semper di D2U-365 riba terenonan INTERNACIONAL...

